

皇明經世文編

皇明經世文編卷之三百五十八

華亭

徐孚遠聞公 朱徵璧尚木

編輯

陳子龍卧子 平待問存我

許清胤价夫叅閱

龐中丞摘稿

奏議

龐尚鵬

清理鹽法疏

山東長蘆鹽法

竊惟天下之法固未有全利而無害者惟較其利害之輕重擇利多害少者爲之在善於調停而已長蘆

皇明經世編

龐中丞奏疏

鹽法

一

平露堂

三十七

山東之鹽法較兩淮疏通爲易然其間利害相尋亦未嘗無可言者謹遵勅諭明條開列上請乞勅該部再加查議施行

阻滯者作何疏通 一山東運司永利等八場原應本色鹽八萬三千餘引嘉靖二十九年因官塋等十一場遺下逃丁折色鹽四萬二千七百餘引奉例改行八場買補遂增至一十二萬二千一百引有奇今積滯之數計五十七萬七千九百八十三引邊商內商交受其病共稱買補之鹽數至四萬此壅滯病根

也臣查得入場每年常掣小引鹽十二萬解部餘銀通足原額惟買補勘合積累數多以致引壅鹽賤諸商告訐迄無寧時若將買補四萬引暫停開邊則數年之後盡見疏通矣但念糧草缺額無從處補事勢恐難遽行因召集邊內二商面示以不便狀各商卽欣然告臣曰今日鹽法之壅滯不專在新增買補而鹽包重大亦此一端也蒙加給酬勞鹽及節蒙新例增添大包每引至五百六十斤行鹽多而消引少安得有疏通之期今酬勞鹽斤願行裁革每包每引係

正支者五百斤、係原額八場買補者、四百五十斤、每年應掣十二萬六千、小引之中、共增出二萬三千五百五十四引、每引俱四百五十斤、納餘鹽銀三錢二分五厘三毫四絲、共該銀七千六百六十、三兩三錢二分、除將六千四百九兩八錢七分解部發邊、抵克四萬引糧草外、尚餘銀一千二百五十三兩四錢、一體解部、臣反覆深思、兩利俱全、無踰此法、待積引疏通、然後照原額開中、未晚也、此皆出自邊內二商懇切之至情、臣獨謂其籌畫曲全、使公私兼濟云爾、况

兩淮商人減搭配山東四萬引、尤其情之所樂趨者
一山東官臺等十一場、舟楫難通、商販不至、各場
竈丁、例許煎鹽變賣、抵納課銀、往往被官兵以私鹽
捕之、竟無地轉販、真所謂奪其食而復扼其喉矣、節
經題奉 欽依、給以小票、每票該鹽五百六十斤、共
納銀二錢五分、內一錢五分作本丁課銀、一錢作餘
鹽銀、各編定行鹽地方、不得私相攙越、及不許濫出
青登萊三府之外、隨鹽給票、按月納銀、印鈐總發於
運司、掛號截角於州縣、場官據票以徵課、竈丁執票

以行鹽綜理周詳宜乎公私兼利無不可行矣然法
立未幾尋復中廢何耶蓋竈丁之貧富不同上丁每
年課銀八九錢中丁五六錢下丁一二錢量力徵科
歲有定額今每票銀二錢五分無論丁力之等則無
問鹽貨之多寡立限追票一票取盈爲力旣難孰能
強之且竈丁領票一張畏避納銀經年不繳雖驅而
之州縣勢必不能也况一入官門便有苛索彼何樂
而受制官吏耶往往減價賤售私通鹽徒而府衛州
縣巡鹽官復以私鹽比較追捕甚嚴以致私販成衆

望風拒捕、鬪殺之禍、所至有之、其爲地方之害、非一日矣、斯皆法禁太煩、更相牽制、遂致沮格不能行、查得青登萊三府、凡軍衛有司、巡司等衙門、每季責捕私鹽三十斤、每斤銀一厘、共銀九百三十六兩、歲所解者、常不及三分之一、多係扣追民壯工食量爲抵償、故不得不強捕竈丁之鹽、以寬已責也、今自臣愚揣之、各場竈丁、旣照額納課、則其所煎賣者、不得謂之私鹽、而諸色人等、日與之交易、亦不得謂之私販矣、蓋課銀旣納於官、竈鹽卽官鹽也、將何名而以私

鹽捕之哉。今議竈丁每戶給與印信小票。內開上丁幾丁。每丁該正課銀若干。中丁幾丁。每丁銀若干。下丁幾丁。每丁銀若干。各就場分遠近。及府州縣丁口繁簡。彼此搭配。明開票內行鹽地方。不得侵越。運司用印鈐蓋。各照年分給發。除額辦正課外。每年上丁止納票銀二錢。中丁一錢。下丁五分。其票每戶各給三張。以便分行執照。票銀隨正課。依期追納。有詐稱無鹽。不願領票者。查出重治。其原不在場煎鹽。止納正課者。不必給票。各府衛州縣巡捕等官。如遇竈鹽。

入境無印信票照、及雖有票照、不係原定行鹽地方、
卽時執捕、並以私鹽論、此外不許仍前濫行騷擾、其
各該衙門、原捕私鹽額數、盡行豁除、卽以票銀抵補、
當亦有餘、自此鹽法疏通、而竈丁無抑勒之患、其利
一也、鹽禁報罷、而官捕免責追之勞、其利二也、貿易
公行、而鹽徒絕格鬪之禍、其利三也、凡掛號截角、一
切繁文通行裁革、地方民竈、莫不相安、而各得其所
矣、或曰、每票納銀二錢五分、其利無窮、若行此法、不
坐虧損乎、夫竈丁旣納正課、已足原額矣、復行加徵、

何以堪命寬一分卽竈戶受一分之賜况前後議給小票皆不能行往事已有明鑒何必強其所難再照山東竈丁俱係十年清審一次歲月旣久消長難齊合改爲五年一清庶無偏累不均之弊及濟南府所屬濱州武定霑化蒲臺海豐利津新城等九州縣附近鹽場官商願興販入其境往年已令竈丁納銀給票發賣其各州縣追捕私鹽悉照青登萊弛其禁則近場之地鹽法通行而竈丁亦與有利焉 一薊鎮開中布花鹽每年兩淮玖千餘引長蘆四萬五千餘

引自四十年起至隆慶二年止，積下淮鹽七萬引，蘆鹽三十六萬引。今據各商告稱，納過淮鹽糧草三萬引，蘆鹽一十五萬引，實收倉鈔俱已投到運司，而戶部管糧衙門拘泥舊規，務要每年糧草俱完，方行類填勘合，以致未納者觀望畏難，已納者遲迴坐困，鹽法壅滯，糧草缺乏，無怪其然。乞查照近日題准事例，每年三千引，共填一勘合，不致展轉留難，庶使商人聞風爭先，而積滯之勘合自此疏通矣。

私販者作何禁制 一查得北直隸山東河南各州

縣地面中多鹹鹵。私煎貨賣者比比皆然。以致私販橫行。官鹽壅滯。弊端坐此。乞行直隸兵備道山東河南鹽法道。通查民間私煎地畝若干。每年鹽利若干。從實體勘。無容隱漏。法應禁治者。卽嚴行杜絕。仍許人首告。以憑拏問。其有地本鹹鹵。不生五穀。若復禁止私煎。是絕其衣食之源矣。必從長議處。斷今依額納鹽。發官商領賣。或給印信小票。令其肩挑背負。易米營生。不許乘機攙越別境。務要與官鹽全不相礙。方許酌擬遵行。此亦便民一策也。

專利偏累者作何調停 一御馬監歲用啖馬涼鹽
原係差人下長蘆鹽運司各場收買往往用強夾帶
抑勒橫行商竈場官聞風逃避其爲害誠有不能盡
言者合無移文本監知會及查每年該鹽若干先期
行令該司查處前鹽照數收貯公所以備交納臨時
仍聽天津兵備道督察查驗卽日起程毋致仍前下
場凌虐官吏細打竈丁而商人支鹽自此不致缺乏
鹽法亦於是乎疏通矣

本色折色今不同者作何定擬 一各運司鹽法三

分存積七分常股此祖宗舊制也近因兩淮引目壅滯該臣具疏題請將存積三分暫停報中已奉欽依遵行今查得長蘆山東二運司原派引目俱係搭配兩淮今既停中三分則長蘆山東力難獨舉合無暫令各商內將三分於運司報中量增其價改納折色解部發邊庶年額不虧官民兼利是亦權宜通變之術也且查先年明例兩淮全納本色山東長蘆俱納折色若遇年豐願納本色者聽從其便今偶一行之待兩淮引目疏通然後中納本色遵舊額施

行、再照長蘆鹽利多而引目少、商人爭欲增額十餘萬、但恐將來壅滯、未免紛更、兩淮山東舊事可鑒也。今據執詞甚堅、歧望最切、臣已督同運司各官、從長計議、欲量增五萬引、於運司報中、每引納銀二錢五分、聽其自行收買、仍照例遵納餘鹽銀、歲可得銀三萬兩有奇、俟行之數年、若果疏通、以漸增益、或再倍之、亦無不可、如或難行、隨宜停罷、於鹽法初無損也。

一山東與長蘆接壤、鹽皆露積、久而色變、商人皆願折價收買、不願支鹽、及查兩浙有水鄉鹽、有濱海

鹽濱海本色。水鄉折色。弘治年間議令各場竈丁有離場三十里內者、全數煎辦三十里外者、照水鄉事體、全數折銀、山東長蘆竈丁居場者十之七八、其二三散寓於附近州縣、或離場二三百里不等、而照丁辦鹽之數、明載竈冊、每年總催逐戶追徵、每引該價若干、總催私索輒倍之、及買鹽上坨、未必及數、而商人不得實支、合無通行各場備查在場若干丁、各照濱海事例、一體納鹽、不在場若干丁、各照水鄉事例、赴運司照冊納銀、通關內開本色鹽若干、折色鹽若

下商人下場本色支鹽一引折色支運司庫銀若干
自行收買底鹽法不廢商竈兩便

清理薊鎮屯田疏

薊鎮屯田

竊照薊昌爲肘腋近地北護陵寢東翼神京視
各邊爲持重焉兵馬錢糧動關諸省犬羊窺伺切近
門庭仰厯宵旰至懷非一日矣臣行役東來查每
年供億之費不下百餘萬而屯糧亦在數內今舉其
糧額計本折猶不及拾萬而屯田之荒蕪者凡一千
一百頃有奇除不堪耕種力無所施者難以責成外

其餘設法開墾以漸圖之數本不多爲力似易顧所以督責而考其成功何如耳臣反覆詢謀各盡所見復會同督撫巡按巡屯諸臣就事忝酌規畫僉同似亦屯政之一助也一立號紙以清隱蔽照得衛所屯田不許典賣禁例甚嚴但沿邊軍丁日漸消耗其間私相典賣者無地無之每田一分蓋不啻十易姓矣若必盡法清查給還原主則告擾紛紛迄無寧歲而主無見在或一時召佃乏人相繼拋荒額糧虧缺此其勢所必至也今議設立號紙界爲三方督令衛

所掌印管屯官。查明填造。上一方書本軍姓名及原祖何人。或見存。或故絕。中一方書屯田坐落土名界至。及原額畝數。或新增若干。下一方書本軍自種或某人承佃。或見今拋荒。或係侵占埋沒。除本軍自種者無容別議外。其餘承佃者。各人照常辦納屯糧。幫貼軍裝。不必抽軍騷擾。以滋他弊。而拋荒之當開墾。隱占之當查勘。亦據此常行矣。立號紙填完。攢成文冊二本。一留該衛。一送兵備道存照。一撥軍士以廣開墾。查得拋荒屯田。無慮千頃。召種者日勤播告。

承佃者百餘二三已非一朝一夕矣。臣反覆深思。惟有分撥軍丁。隨地耕種。最爲今日首務。荒蕪之田。遠近不一。關營墩寨。各就其所便利者而給之。兵備道委官督同衛所各官逐一清查。某土名荒地若干。堪以耕種若干。各隨方隅。明白開報。仍計量工力之難易。如何。畝數之多寡如何。因地撥軍。從宜區處。通呈督撫衙門詳奪。就委所部將領等官。以時監督。待三年成熟後。方許徵收子粒。卽支作官軍月糧。其田給爲永業。公利兼利。本非強其所難。巡撫都御史劉應節

與臣計議謂邊軍操守。寒苦萬狀。日以枵腹爲憂。邇來修邊頗有餘閒。若撥給荒田。儘力耕種。歲得收其子粒。以自利。此優恤之政也。但各軍煢然一身。誠不憚勞。若牛種皆稱貸於人。卽束手無策。今查見存犒賞之牛。不下數百頭。卽令給散各軍。及查處種子與之。三年之內。牛種還官。所得田租。聽其自贖。當爭先爲之。不待驅使矣。兵備道任督察之勞。各將官司分理之責。給過田畝。撥過軍士。支還牛種。開墾過數目。各類造一冊。按季覈實。呈臣及督撫衙門。以憑分別。

勸懲務期實效。該道綜理之能否。悉於此考見。今查
永平府見停牛種銀一千餘兩。各州縣亦多有之。不
待別行厝處。自可隨時查給。及照各路關營原有邊
儲地就近耕種。歲納本色。原不在屯田額數之內。今
以拋荒田畝。照此施行。卽兩利俱全矣。一寬差役
以廣召種。查得各邊屯田堪耕者多。而往往拋荒。其
故何也。或憚包賠之苦。或慮抽軍之害。或本管官旗
科尅。或沿邊將領誅求。利未得而害已隨之。此召種
之所以難也。除撥軍就近耕種外。其或地里僻遠。軍

士力不能及者。當明立召種之令。凡開墾荒田。通免
抽軍。及僉克糧頭。併雜泛差役。各該管衛所。或附近
有司衙門。給與執照。永爲已業。應徵錢糧。各考其用
工難易。或量免三年。或全免五年。俱待成熟得利之
日。酌量分數。沃土如何。瘠土如何。務從寬假。不必屑
屑拘定原額。若得斗納斗。種尺納尺。夫誰爲之。成業
後。若有原主告爭。另查空閒田土。給還其各衛所掌
印管屯官。通查拋荒屯田。以十分爲率。能召種七分
以上者。通行優獎。其不及四分。或因而需索開墾人

尸一錢一物者。定行戒飭住俸。甚則叅提革任。庶幾人無畏疑之心。官有招徠之法。而荒田不至汙萊矣。

一嚴督責以清欺隱。查得各衛所屯田。或本軍在逃。地歸衛官。而隱占之弊生。或兩圖便益。私相典賣。而埋沒之弊生。或勢豪利其膏腴。逼勒抵換。或官舍因其隣近。徑自侵漁。而兼併之弊生。或承佃年深。懷爲已業。或指稱隙地。投獻權門。而雄據之弊生。是以糧多虛賠。爲害滋甚。除行各衛所照號造冊。另行清查外。合無通行示諭。凡有侵占埋沒等弊。許自首免。

罪歷年所得花利、姑免追、其田退出給軍領種、他人指實首告者、卽將原田給爲己業、其衛所掌印管屯官、通查侵占埋沒屯田、亦以十分爲率、能清出七分以上者、定行獎勸、其不及四分以上者、嚴行戒飭、或叅提住俸降級、不容輕貸、若自行侵占埋沒者、各從重究治、使彼此互相覺察、而屯額庶乎其不虧矣、一免包賠、以便徵解、查得沿邊屯田、有原係膏腴可耕之田、一遇山水泛濫、輒漂沒成河者、或有沙石及瘠薄不堪耕種者、或有虜騎出沒無常、不得收穫者、



或爲兵馬通衢。多被蹂踐者。地雖荒蕪。其糧仍在。額徵之數。連年杖併。督責包賠。逼促流移。皆坐於此。合無通令填入號紙內。按其土名。委官丈勘。果無欺弊。卽與豁除。或查有別處新增量行給補。其應納糧草。通填定實徵冊。及以由帖給屯戶。明開本年或全徵。或減免幾分。或本色。或折色。使人人曉然。不得仍其舊弊。而糧頭亦有所憑藉。以便收解。庶幾得免包賠之苦。永無逋流之患。一審糧頭。以杜偏累。查得衛所屯糧侵欺拖欠。姦弊固非一端。然審編糧頭。最多

規避而屯丁之偏累甚或挈家逃流無地控訴此侵漁之弊所以不能革也自今宜擇委廉明有司督同各衛所掌印官每三年一清審將本衛屯戶分爲等則或輪流應役或協濟朋克酌擬成規不得遷就其有納克吏承等項名色希圖優免者除本身外其餘戶丁不許一槩濫免事完造冊二本一留該衛一送兵備道覆覈備照庶乎貧軍無獨累之苦而錢糧得徵解之宜矣。一明區別以墾荒田查得沿邊曠地何下百萬頃原不在屯田民田額數之內往年密雲

兵備副使張守中分撥軍士開墾成業永不起科。至今連年享其利。但於通力合作計畝均分。猶有未盡事宜。漸覺紛爭。較長競短。恐將來有廢弛之患。蓋地之肥瘠有難例論。人之勤惰彼此懸殊。至於每歲收成皆一槩取必。而無所區別於其間。是導之以爭也。合無行兵備道督同將領酌量名數。派以坵段。仍攢造田畝冊以備查考。各令盡力勸相。均其勞則亦均其利。毋使退有後言。或相魚肉。所部將官有漁奪於其間者。許指實具告。以憑究治。庶乎裁制有法。永久

可行其餘荒地不能盡墾者所至有之凡諸邑人等有能儘力耕種悉免起科一遵祖宗詔令則古之所謂募民實塞下當自此再見矣邊境富饒則轉輸不勞而自足利在民者未始不在官也又何必責其供軍乃爲國家之利耶邊人日夜望此舉久矣。

一寬斗頭以廣開中夫商人捐貲中引視召商糴買卽給見銀者大不相同若非寬卹招徠恐本重而利輕各商解散卽強之不能至矣查得薊鎮自嘉靖三十七八年始開鹽引中納邊糧兩淮水鄉鹽九千一

百四十九引、每引定價銀五錢、長蘆折布鹽四萬五千三十三引、每引定銀二錢、開額數年、而報中甚少、此其故不待智者而知也、先年淮鹽一引、納糧二斗五升、蘆鹽一斗、後因米價稍平、覆議淮鹽三斗、蘆鹽一斗三升、其後陸續議增、淮鹽五斗、蘆鹽二斗一升七合、尋以米價騰湧、各商具告部堂、轉行查估、淮鹽酌減三升、蘆鹽減一升三合二勺、各商觀望、日月遷延、在官司取盈於銷銖、以足原額、在商人較量於升斗、以規厚利、彼此牽制、多顧避嫌疑、以致官與商人

非惟不相濟而反相病矣。合無自今准鹽五錢、蘆鹽二錢，原有定價，不容增損，惟以時估之外，量從寬假。若果豐年，卽准鹽五斗之上，量議增益，亦不爲過。如遇荒歉，卽十減三四，亦不爲少。但令商人稍有盈餘，乃爲通商足邊之長策。其所定時估，不可拘爲一例。如薊州糧一石，時估若干，運至某處近倉，該增若干。某處遠倉，又該增若干。其他州縣各邊堡倉口，莫不皆然。務要反覆酌量，市斗倉斗較若畫一，各無異詞。明揭告示，聽商人認納，刻期完報。查得時估一節，先

從州縣起、而後達於兵備道、以及管糧衙門、至部堂而後定、原有遞減之例、故州縣與該道不得不少寬其數、以備再減、事皆沿襲、似爲俗套、而商人觀望於其間、不免益增他費、合無今後州縣各照的確時估、聽兵備道與管糧郎中等官會同訂議、免關白於部堂、庶不致低昂互辭、商人得以有詞、及訪得本鎮有賣窩姦徒、抑勒各商、阻壞鹽法、除臣另行拏究外、自今承認之後、若兩月以上、糧不到倉、卽係光棍包攬、許別商另投甘限認狀、依期完納、仍查原報姓名、訪

卒重治及照鹽商之糧專備客兵支用往往稱難若改給主兵月糧及米豆兼納或四分主兵六分客兵則諸商皆欣然就之矣。

清理宜府屯田疏

宜府屯田

照得各邊或有可耕之地而無其人或有可耕之人而無其時凡以屯軍消耗虜患頻仍故原額屯糧日就虧損皆其勢所必至也惟宜府邇年來休養生息家有餘丁不患無其人矣隄防警備歲鮮虜塵不患無其時矣乃邊人獨苦於屯田利一而害百皆徵歛

煩苛。虛糧不均之弊也。歲額懸空名。而屯軍蒙實禍。豈一朝一夕之故哉。臣博訪羣言。曲加叅酌。謹敷陳末議。似亦一時救弊之權。一辨等則以清糧額。查得該鎮延袤不及五百里。山川夢錯。地多不毛。求其可施鋤犁者。僅十之三四。而沙礫半之。先年差官首清欺隱之弊。督察甚嚴。以致承委各官。妄增虛數。其初額糧一十八萬石。遂積至二十萬六千有奇。多係懸空攤派。非必丈量皆有餘地也。每地一分。計二十五畝。歲徵正糧三石三斗七升五合。糧額之重。視蘓

若論此則起科亦未為重于蘇松也

松尤特甚焉。夫蘓松東南沃區也。人人操奇贏之利。故取給不以爲難。若宜府孤懸塞外。生計蕭條。旱潦無常。虜騎充斥。卽使其廣收而薄歛。猶患不能自存。況地一畝。額糧一斗三升。且不問肥瘠。一槩取盈。其何以堪命乎。若夫貪墨之侵漁。豪強之兼併。富者有田而無稅。貧者有稅而無田。其爲累有不可勝言者。先是巡按御史周詠題奉 欽依。丈量其建議可謂詳矣。臣於此復有裒多益寡之說焉。合無驗視地力。分爲三等九則。酌擬徵科。雖號稱膏腴者。每畝不得

過一斗其餘等則各以是爲差。庶乎輕重適均。永無偏累之弊。夫改重爲輕。則原額不免虧損。非正法也。今議該鎮糧額。名目多端。除地畝起科墾種等項。原屬民間私相買賣。爲子孫世業。通與丈明。除照等納糧外。其原額屯田團種。及邇來查出功臣香火。及養廉牧種附餘等地。通革去紛紛名色。併入屯田項下。將額糧照則均攤。盡作實徵之數。其往年新增虛糧。通行除豁。不得虛實混淆。以滋紛擾。至於公務驛傳地。其間盈縮。有難一槩取齊。而歲用紛紜。原無定數。

亦非所以一徵科而革姦弊也。合無督責委官悉心查算除驛傳銀先年已經裁革外其公用每歲若干隨事劑量著爲成案不足者從宜樽節有餘者作屯糧放支畝數若多改入屯田額內務令事皆考實而弊蠹悉清丈量之實政旣行則原額之屯田盡復人有定業疑畏不生若撫御得宜催徵有法屯政不患其不修矣。一革養廉以補屯種宜鎮地方狹小糧額繁重復加以將官之養廉相繼呈請蠶食漸多橫借私牛濫役官軍以耕稼而滋荼毒使人人疲於奔

命蓋日益月甚矣利歸於已害將誰歸除各路將官
閭守中等已將原種養廉田具數還官外合通行禁
約自今以後不得指養廉名色侵奪屯田凡係以前
隱占者俱要盡數退回給軍耕種如違聽臣叅論處
治若果先年原奉 欽依撥給及地懸絕境土人不
敢違耕聽各該將官申呈明白率家丁管種通免起
科今查養廉之田有數百頃者有數十頃者有全無
尺寸者卽不盡革亦當行督撫衙門量爲差等使多
寡適宜以示大公一體之義 一酌權宜以實邊儲

查得該鎮每年開派淮蘆鹽共二十三萬四千二百

中全完而宜鎮乃欲增派及預納者何也以本色

六十三引先是報中利微積引數多近來鹽法通行

易致故耳

除當年引目盡數報中外復先期報納各路米豆不

下十萬石已經輸運到倉隨據商人徐岳范臣等四

十餘人具狀赴臣告理乞增開鹽額及查各邊未中

殘鹽轉發本鎮填給勘合以補預納之數夫商人報

中爭先固當從權區處但淮鹽壅滯以數百萬計臣

前題奉 欽依將存積三分暫行停中正欲堆鹽疏

通恤內商亦所以濟邊商也今復行開額其勢決不

可能矣。合無通查各邊殘引及臣去歲題准長蘆
竈丁殘鹽三十餘萬已經豁免聽商人於運司納折
色報中合無改發宣鎮填給各商若引少糧多數猶
不足先將預納之糧嚴查覈實一面出給倉收付以
執照戶部查先年郎中褚寶預開鹽引之議於今年
秋成之期預發來年引目先將給過倉收商人儘數
填發庶各商見贖之糧得以乘時見售自今以後申
明曉諭使知引目既減皆計引以輸糧則資本不虧
而於傳中三分之成命亦不至背馳矣夫以先期


積糧數至十萬。設法區處。當爲早圖。乘此人心踴躍之初。不有以大慰其望。則聞風解散。勢難復集。是往歲招之而不來。今乃拒之而使去矣。改給殘鹽。預開引目。皆一時權宜之法。公私兼利者也。

清理遼東屯田疏

遼東屯田

竊惟遼東京師左臂也。一面瀕海。三面與虜隣。惟山海關通一線之路。與內地相接。舟車商賈之利。歲不能十一焉。故上之所以給軍需。下之所以供歲事。舍耕稼之外。無他策矣。地多沃壤。鮮賦稅。常薄種而

皇明經世編

 龐中丞奏疏

遼東屯田

三

平露堂

廣收。獨其人不習葢藏。一遇荒年。無路乞糴。輒相繼填溝壑。且先年旣改屯軍爲操軍。兵荒相尋。尺籍消耗。耕作之業。率歸舍餘。屯軍已盡廢矣。舉千里曠土。皆欲同時興耒耜。其勢能乎。近賴撫臣勞來安集。寬召種之令。人皆翕然就之。始知有生民之樂。但遼河以東。人多輻湊。漸可招徠。惟河西地方。屯堡蕭然。十室九空。其間附城而居者。復有操備送迎之苦。勸相開墾。當爲漸圖。若不因地制宜。曲加存恤。恐歲月遷延。汙萊猶舊。雖有良法。亦徒託諸空言而已。臣親歷

邊隣從宜計畫。及會同撫按衙門。更相考訂。共要其成。乞 勅該部叅酌施行。一設圈臺。以便收保遼東沃野千里。凡附近城堡者。無尺寸不耕。惟曠遠之地。滿目蒿萊。無慮千百頃。蓋零賊出沒。恐無從遮蔽也。今行該寺道。查各處荒田。凡甚耕獲者。督行將領各就其便利。撥軍管種。耕則通力合作。收則計畝均分。處給牛種。隨便還官。仍相度地宜。督令修築圈臺。遠近聯絡。如零騎入境。卽收斂人牛。先爲防避計。其同田軍士。或專耕獲。或爲哨望。彼此更番。利害同情。

耕於此。守於此。食足兵強。而戰亦可恃矣。此與營田之法。跡雖近似。而其實大異。一寬糧額以勸開墾。查得該鎮最多可耕之地。而無其人。或有可耕之人。而無其具。且歲事荒歉。虜患頻仍。開墾曾未踰年。而徵斂誅求。迄無寧日。往往苦於包賠。雖三尺之童。亦知所趨避矣。孰能強之。今旣撥軍耕種。凡一應園臺。皆責其併工修築。以爲耕牧之地。用力用勞。非旦夕可以坐享其成也。若仍照額徵糧。卽慮始之難。已疑信相半。又安保其不終廢耶。今議開墾六年後。如果

成業然後酌量分數。定立差等。隨其遠近肥瘠。從宜起科。使人人皆知其爲永久之利。則荒田無不盡墾矣。一開溝洫以備旱潦。遼東地方多平原易野。而岡阜之高低起伏。亦曲折相尋。其間接連河海者。千百十一耳。故旱魃爲殃。則赤地千里。霖雨彌月。則泛溢成湖。天災流行。秋成失望。凡以其備之無策耳。今行各寺道。選委有心計文武職官。相度地形。定溝洫之制。河流可導也。則因其勢而利導之。其或彼此相隔。疏濬爲難。則審視下流。開鑿渠堰。遠近大小。順其

疏濬水利乃屯田之本計

方隅使原隰高下水有所歸潦則疏之以爲容納之區旱則引之以資灌溉之利而何凶年之足慮乎劑量既定揆日程工舉千百人而相率爲之卽塹山堙谷當不勞餘力况典此役於原野而督責以考其成直在舉手投足間耳又何難焉此不惟可以興水利而亦足以禦胡馬一別功罪以專責成遼東地廣人稀歲多零賊鈔掠無常非以耕種之事屬將校任之則觀望畏難欲士卒各安其業決不可得也今行各寺道督同將官隨地分布多者千人以上少亦不

下數百人。聲援相應。合耦而耕。卽千百頃可旬日迄。上其地閒曠已久。土膏甚潤。菽麥旣播。生意勃然。二月而耕。東作在息。兵之後七月而穫。西成在防。秋之前併力舉之。亦不過浹旬耳。然此必將官親爲提督。察其勤惰而勸懲之。每年以收成之多寡。課將領之殿最。督率有功者。特加獎勵。勸相無方者。嚴行戒飭。分別具題而賞罰行焉。則彼此責成。各以哨隊相統率。不令而自行矣。一廣召種以闢荒蕪。查得

國初設屯田。歲徵糧草以給操軍。實兵農相濟之利。

也遼東自成化以後盡將屯軍改爲操軍而屯田之廢墜非一日矣故有其地而無其人雖在上者日窮其智力將安施乎邇年來惟操軍之幫丁及各該舍餘耕種者猶納糧不缺其他丁力單寡者調操且無寧日豈暇從事畎畝耶以臣愚見揣之撥軍耕種固爲良策然東戰西守或無常期春作秋收恐無常業其成效猶難必也合無示諭各該衛所等衙門除屯田見種納糧者不許紛更外其餘荒蕪者無分官旗舍餘寄籍客戶聽其自行認種各照頃畝告給牛種

待五年之後。若有收成。仍分別上中下。辦納屯糧。其有逼臨虜穴。及工力繁難者。永不起科。若原主告爭。不得追奪。另查荒田給還。此亦多方招徠之法。臣巡歷所至。紛紛具告開墾者。已經批行各寺道衙門。查撥耕種。蓋耒耜徧野。則蓄積富饒。軍士以折色而糴。買供家商人以鹽糧而報中規利。皆隨在各足。不待遠求。其爲塞上之利亦博矣。一清遊丁以便招集。查得該鎮行伍空虛。屯田蕪穢。多由數年來。或殺虜於強寇。或凍餒於荒年。戶口消沉。日益月甚。其間亦

有乘時逃竄。所至爲家。避差科之勞。懼戰鬪之苦。相率走匿於窮鄉。東南山乃其淵藪也。一二年來。或相繼投軍。然一姓報名。數姓影射。一丁在冊。數丁安閑。若盡法搜查。恐追求太激。或失撫字之宜。今須議行保甲。譏察面生可疑之人。凡見在人丁。戶分主客。俱令登報。不許扶同隱漏。待清查既畢。然後下令曰。凡流寓此地者。原日逋負。及各色罪名。通行蠲免。聽其各相朋合。每五丁抽一強壯者。守禦地方。餘四人卽爲幫丁。給以屯田。儘力開墾。一如撥軍耕種事例。五

年之後。果有收成。方量徵子粒。或永不起科。則彼得
墾田。互相存活。而官得壯丁。堪備戰守。一舉而數利
具焉。先年撫臣招兵東南山。有願備鞍馬投充報效。
不終朝而應募者數千人。彼謂生聚既廣。終不能免
役於官。故以報效爲詞。告取壯丁。占據名下。雖曰用
命於官。實所以爲自全計也。今優以幫丁。給以屯田。
惟其情之所欲。而曲遂其私。彼將聞風來歸之。恐後
矣。此不惟可以墾屯田。而亦可以實軍伍也。一議
營田以廣儲蓄。查得該鎮屯田拋荒數多。往往缺人。



佃種故先年改爲營田。撥軍耕作。牛具種子。給領於官。終歲以農爲專責。而戰守不與焉。故人皆爭爲營田之軍。爲其有利而無害也。况月糧之外。復給口糧。而歲斂所入。原無常數。百計侵漁。曲事蒙蔽者。所至有之。故就其月之所給。計其歲之所收。多寡較量。或有大相懸絕者。田雖不至荒蕪。而權其損益。所得幾何。今遽行停罷。則其田拋荒。尤爲失策。合無令其照舊耕種。先將應納額糧。抵其歲支本折之數。仍查羨餘若干。盡入官倉。以備支用。如遇警報。雖免其身親

聖祖屯田原先抵月糧而另納餘糧也

赴敵而防守城池。皆一體編派。使不得規避苟全。庶無苦樂不均矣。凡此皆爲一時權宜之法。若有可耕之人。卽改復屯田。盡革營田名色。軍回原伍。照常操備。此上策也。一寬海禁。以備接濟。遼東地當瀕海。土人以力農爲本業。自嘉靖三十六七年。災虜相仍。米價騰湧。人且相食。蓋舟楫不通。商販鮮至。豐年積粟之家。旣不能貿易。以規利。一遇荒歉。又不能稱貸於他方。此生計蕭條。閭里丘墟。職此故也。查得山東海運。自登萊達金州旅順口。僅一晝夜。往跡具存。可

按也。後以布花解本邑。爲登萊之累。遂罷海運。而解

折色。前後議復者。持論紛然。竟寢不報。夫海道通行。

遼東一鎮附山東省聖

稅。創。利。本。欲。其。權。通。於。時。

不獨商賈輳集。一如通都。且遼東饑。則以移粟望山。

行。海。運。以。勝。給。之。

東山東饑。則以移粟望遼東。彼此兼濟。豈獨遼人之

利耶。或謂海禁通。則戊卒遁逃。無從譏察。而倭寇或

出沒海島間。禍且不測。况萬頃波濤。民其魚鼈。能勿

慮乎。夫驗引盤詰。禁例甚嚴。金州與登萊。原有委官。

成法具在。悉舉而行之。其孰能飛渡耶。倭寇犯遼東。

自望海埚殲其黨殆盡。垂二百年。影滅跡絕。姑試行

之果海寇至。卽行報罷。寧獨無策耶。若必念風濤之惡。則成化以前。未聞有覆溺之患。何今日爲慮之深也。但議復海運。則登萊不免有造船之費。而布花徵本色。民苦其擾。當事者輒附會他說。以滋羣疑。今惟開其禁。使商賈通行。所在官司嚴盤詰之。令重逋逃之罰。不許姑息。以長姦。其山東布花。仍舊徵折色。由山海關轉解。庶乎官不勞而民不擾。遼東山東兩利俱全矣。否則饑饉相仍。乃皇皇求活於內帑。是何異引西江之水。而救涸轍之鮒魚。其勢之相及。能幾

何哉。况遼東一鎮。以寧前爲咽喉之地。扼寧前。則全鎮危矣。所以爲應援者。猶幸金州濱海。通道登萊。苦必疑懼而閉之。恐變起不虞。呼號無路。杞人之憂。蓋有不忍言者。或曰海道弛其禁。誠利矣。若軍士變姓名。望風鼠竄。雖殺之不能禁也。若不先期籌畫。著爲定例。必待荒年。及事勢不容已者。乃間一行之。救時之策。庶幾可行。夫由前所言者。爲百世經久之利。由後所言者。乃一時變通之權。決擇取裁。是地方任事諸臣。審圖其所便宜云耳。一革關稅以資農末。竊

惟山海關控扼胡虜。箝制逋逃。凡有附帶違禁貨物者。悉捕治之。此關法也。各省商人往來於此。百貨兼備。而農具亦於是取給焉。先年抽稅之例。始於太監李能。後主事鄔閔守關。業已奏革。近緣薊遼二鎮。以撫夷之費。遂仍舊額抽盤。歲入凡四千兩有奇。夫商人冒不測之險。而行貨絕域。遠踰數千里。單騎孤囊。晝有風塵之警。顏垣葦戶。夜無衽席之家。彼強顏爲此者。欲規十一之利。以自封殖焉耳。若所至關隘。復苦索之。彼揆度於盈縮之間。或得失利害。不能相

酬卽通都大邑。無往非求售之地。何必屑屑於遼東耶。况寧遠廣寧。皆有稅課司。去山海關不數程。而征商嚴密如此。其何以堪。中鹽商人。亦多貿易於此。以資竒贏之利。紛紛控告。情詞愴然。聞近日課程。鮮能盈舊額。而物價騰湧。大異昔年。事固有明驗也。乞自今惟查引驗貨。一如祖宗成法。悉免其抽稅。卽農末獲相濟之利。而行旅皆願出其塗矣。一增鹽額。以實倉庾。遼東屯糧原額二十五萬石有奇。該鎮官軍。共計九萬員名。卽使正額盡完。猶不足以供三月。

之本色。况地廣人稀。田多蕪穢。近年實收米豆。僅十萬八千石。三月之給。所濟幾何。今兩淮鹽糧。土人爭相報中。惟不喜山東之引。而願增長蘆。紛紛向臣言之。案查去年該臣題 准新開長蘆鹽伍萬引。就於運司納折色。聽其赴場自買。合無將原開勘合。量減其價。改派遼東。猶爲長便。查得該鎮隆慶二年。開過已前存剩。及本年額鹽。共一十七萬八千六百九十四引。止得米豆三萬九千六百一十三石。隆慶三年。分該額鹽一十二萬四千三百一十二引。召商上納。

米豆共計九萬五千三百九十七石。蓋四倍矣。視今日屯糧之數。亦足相當。鹽法疏通於此。槩見若再加長蘆五萬引。豈以壅滯爲患耶。況近日兩淮停中三分。山東停中四萬引。目既少。報中者多。固知其易易也。訪得權勢之家。及將官嗜利者。每遇開派鹽引。多雄據而染指焉。溪壑難填。專利無厭。且險遠之地。巧於避難。派納未完。截給勘合。其末流之弊。必至於買窩賣窩。而阻壞鹽法矣。乞行撫按衙門。督同寺道。不時查訪。如有前弊。嚴行拏究。庶利歸商人。而邊儲鹽

法兼濟無窮矣。

一酌引價以恤邊商據遼商告稱

兩淮引價見蒙題

准則例官民兩便今歲戶部衙

門開派鹽引卽大家小戶爭報名投納以致人多引
少上納利微願革去小戶惟大戶各給千引以上庶
不徒勞無益且山東一引該官價銀一錢五分及分
撥與內商止得銀三四分而已虧折太多無地控訴
乞照兩淮事例著爲成規庶無專利偏累之弊夫廣
中納之門而後鹽法疏通此常理也查得先臣劉大
夏經畧邊儲凡糧自十石以上草自百束以上皆准

報官交納權勢包攬之家。姦弊一掃而盡。至今邊人
頌之。今遼東中鹽者。無論十石五石。皆奔趨恐後。此
正上下相須。豈容禁革。聽其彼此相轉。共填一勘合。
於法何病哉。惟山東之價。原係一錢五分。而分撥內
商不及三分之一。此不容不區處也。乞行長蘆巡鹽
御史。從長酌議。務使邊內二商。兩利兼全。庶可經久
或謂兩淮商人。多親身報中。惟山東長蘆。皆中途接
買。原非真正邊商。若引價過多。徒資姦人之囊橐。實
與邊商無與。此其言未爲無據也。但引價既定。卽揭

示遼東地方。在邊商必不賤售。而分撥之人。亦不得
如往年抑勒矣。內商有新引一百道。方准告掣名下
舊鹽一百引。則邊引之疏通。不疾而速。此兩淮近例
也。何不可行於山東與長蘆耶。

皇明經世文編卷之終

皇明經世文編卷之三百五十九

陳子龍卧子

徐孚遠闇公

華亭

宋徵璧尚木

李待問存我

編輯

許清胤价夫叅閱

龐中丞摘稿

奏議

龐尚鵬

清理大同屯田疏

大同屯田

照得各邊皆與虜爲鄰而盤據門庭惟大同爲近故
邊人失業屯政不脩至今日極矣前後建議興復者

無慮千萬言、其間時異勢殊、有難槩論、自今觀之、惟清查隱占、均平糧額、開墾拋荒、最爲目前急務、三者旣行、則其餘皆不勞而治矣、但憂時慷慨者、或病於勢力之難、厭事苟安者、常溺於因循之弊、此所以日就廢弛而不能振也、臣督同各官、隨事劑量、叅以一得之見、非敢浪爲迂談、其間應行事宜、或有與宣府相同者、彼此互載、不嫌同詞、一嚴督責以塞弊源、查得該鎮屯田糧額之輕重不均、豪強之欺隱滋甚、丈量誠不可已也、必須委官沿坵履畝、隨地處分、已

經巡按周御史題奉 欽依業有成算無容議矣但

恐委官難得其人或聽屬於勢豪或受欺於左右綜
理無術百弊叢生以致伸縮那移飛詭隱占其爲害
可勝言哉且軍民雜處地畝相連加以 王府牧馬
草場將官養廉田地及隨 侍官校免買民屯互相
參錯若犬牙然苟非一體丈量則指甲爲乙各相影
射而軍民之弊不可窮詰矣合通行各衛所州縣督
同各該人戶不論軍民隨 侍養廉草場等地每五
頃爲一大坵上插牌樞明開四至孰爲民田何人管

業孰爲屯田何人見種孰爲養廉何人撥給孰爲隨侍何人承買各依畝數填註姓名坵內四至各滲石灰以防移易增減仍令分別屯田若干見種成熟若干拋荒堪種若干水衝沙壓若干各該種草若干其地畝洪洲寄庄等項亦皆倣此委官查照開款從實丈勘成熟者照舊承耕拋荒者設法開墾水衝沙壓者明白開除仍令置立坵單每坵二幅前半面圖畫地形後半面照前牌檄填寫姓氏及軍民田地各項名色併成熟拋荒數目一送各該掌印官印鈐收照

一送見委丈量官臨時磨對有無異同每坵擇地多而謹畏老成者一爲坵長二爲坵副責令先將坵內地數丈算明白互相覺察填單立楸聽候委官親臨公同丈量仍將地力分別上中下三等九則以便派徵錢糧。一明賞罰以勸開墾查得各路荒田何啻萬頃承佃者疑畏相尋豈獨困於工力哉歲事之豐歉無常也虜騎之出沒不測也差役之徵科難禁也利不能十一而害已七八矣召種雖勤誰其就之今惟責成將官撥軍開墾務令通力合作牛具種子取

給於官。每歲秋收。除將子粒補還牛種外。其餘悉計畝均分。直待五年之後。果有成業。然後酌議從輕。則徵糧。蓋大同地方。切近邊境。耕稼之業。利鈍難齊。故寧損上益下。以示存恤。勸導之意。然此非責成將官。其勢必不能也。一議新增以蘓疲困。照得該鎮屯田。除原額已足外。復浪加新增名色。或據冊有數。而納糧無人。或地本荒蕪。而糧多賠累。人甚苦之。今查各衛每屯田一分。其間畝數多寡不同。甚有彼此較量。大相懸絕者。則於正額之外。復有新增。此亦未爲

無據也。但地本接壤。糧有定額。而水衝沙壓。鹹薄不堪者亦多有之。合無今次丈量明白。卽以新增之地。均攤舊管之糧。疆界旣明。則欺隱盡革。稅斂旣薄。則輸納易完。寬一分。則民受一分之賜。况連年逋負。督責煩苛。徒有新增之名。全無徵收之實。何必駕虛名而滋勞擾哉。至於屯田之外。有所謂地畝洪洲等項。名色皆屯田餘地。糧額甚輕。當爲裒多益寡之法。今據分巡道呈稱。審得地畝等戶。韓玉吳春等。各願帶種拋荒屯田。辦納折色。此亦官民兩利也。一酌支

放以圖實用。照得該鎮屯糧以給主兵。欽買召買

以地方無事徵調少故客兵之糧常有。

以給客兵。邇來客兵之糧常有餘。主兵之糧常不足

除

以故糴買在倉者。有五六年不及支放。倉場之安置。

未必如法。官攢之監守。不免侵欺。歲經查盤。日多虧

耗。守支之累。有老死他鄉。不能歸骨者。且糧既浥爛。

委棄成塵。豈可無變通之法。合將收貯年久者。改給

主兵。將應給折色存貯。如有不堪。亦要因時酌量。將

屯糧彼此搭配。通融關領。卽時補還。此固出陳易新。

通變權宜之法。而官攢之守支。亦不至枵腹待盡矣。

一革偏累以廣報中查得該鎮召中鹽糧俱係每年九月中查取時估定爲一歲常規至於春夏之時青黃不接市價高騰並不酌量寬減以致商人坐困力不能支且據各商糴買糧料每銀一兩該斗行牙行銀二分每米一石自市送倉脚夫要脚價米一升進倉應該耗米二升又每米一石搬運倉臺并晒晾工食銀六厘擡斛上洒工食銀五厘入厰扛脚銀七厘飯食三厘墊厰席價銀六厘大率每米一石雜項使用費銀八分六厘料豆之費與米相等而草束雜

用。視官價倍之。及積貯年久。倉場之滲漏。糧料之虧損。查盤問罪。照數追賠。甚有逮繫妻孥。瘐死獄中者。卽土商且不能堪命。況遠商乎。據各商執告上草一萬束。自願加納一千束。以備虧折。聽官攢守支。則其情可槩見矣。至於給銀糴買。僉報商人受禍尤酷。如李世臣。丁漢臣等。控愬無門。飲藥自盡。皆近日事。可爲痛哭流涕者也。民爲邦本。乃歲歲驅逼而荼毒之。彼何辜而死於非命。一至是耶。合無自今以後。各路時估。俱每年分爲四季。城堡有遠近。歲時有豐歉。物

價有低昂。先從各該守巡兵備道督同軍衛有司隨地劑量、按季詳定、然後關白戶部管糧郎中彼此叅酌給示通行、仍著立限期、如春夏時估、卽限春夏上倉、若延至秋成、卽改從秋季時估、以革遷延觀望之弊。其應用斗脚工食等費、皆常規決不能免者、公同會估、卽議入數內、無令蹙額包賠。其糧料納完、卽隔別委官查盤明白、付官攢守支、並不得與諸商復相閑涉、而後禍端可絕也。一禁囑託以繩巨姦、照得該鎮專利之徒、所至有之、凡遇開派鹽糧、輒請託鑽

求先投認狀此賣窩故智也升斗之粟不入倉庾而坐收千金之利商人受其抑勒耗費愈多虧折邊儲阻壞鹽法莫此爲甚合通行各路守巡兵備及本鎮管糧郎中先期禁絕凡鹽糧開中俱於各該地方張掛告示明開准鹽若干蘆鹽若干時估斗頭若干聽各商人先赴各倉上納完足監督通判等官卽出給實收齎投赴部以憑填給勘合其糧未入倉先告認狀者不得徇情准受以滋前弊

清理山西三關屯田疏

山西三關屯田

照得各路嚴關隘以固邊防廣屯田以足兵食務農
講武坐制強胡此兵家之勝算也除保定各關原屬
內地其屯務聽該鎮撫臣自行經理外若山西三關
逼近犬羊爲門庭之寇視諸路特稱要害焉設軍屯
田其來已久歷年申飭具有成規似無客紛更矣但
人情偏泥於故常未免因仍之弊部卒苟安於游惰
不親稼穡之勞所以督察而利導之蓋不獨致詳於
禁令之間而已臣巡歷西來詢謀僉同雖摘舉其大
端而一時興革事宜或不外此一廣耕牧以資戰

守照得三關平原沃野悉爲良田。若問拋荒。惟孤懸之地間有之。亦千百十一耳。其餘山上可耕者。無慮百萬頃。臣嶺南人世本農家子。常嘆北方不知稼穡之利。頃入寧武關。見有鋤山爲田。麥苗滿目。心竊喜之。及西渡黃河。歷永寧入延綏。卽山之懸崖峭壁。無尺寸不耕。彼皆長子老孫之人。豈浪用其力。無所利而爲之耶。查得三關軍士。除防秋外。凡調操按伏之事。歲能幾何。餘皆游惰苟安。掉臂閒步。竟不思爲終歲計。欲其飽歌騰槽。投石超距得乎。今宜督責副叅

地力不盡

附北人不事稼穡遊惰者多故

遊守等官分率部伍躬耕境上。凡山麓肥饒之地聽其自行採擇定爲經界議立章程各伍以隊長主之務要彼此相聯耕則通力合作收則計畝均分牛種取給於官聽一二年後照數償還所耕之地永不起科其將領等官每年將開墾過地畝若干收過子粒若干具報巡撫衙門及兵備屯田道以憑酌量等第從重嘉獎其有坐視因循迄無成效定行切責以示不職之戒則兵農相須俯仰有賴耕於此守於此古稱屯田金城坐困西羌者用此策也。一議減折以

杜偏累照得宣德七年以保德州據河爲險獨當虜衝撥三護衛軍八百名調守隨將忻州抄沒地一百四頃七十二畝一分該糧九百五十一石二斗二升給軍耕種每石徵折色銀五錢至嘉靖三十二年奉例加至八錢今查山西通省屯糧每畝起科不過三升二合忻州民地每畝最重者亦止伍升有奇惟該所屯田實徵糧九升八合三抄彼此較量大相懸絕且軍隸保德地坐忻州相去五百餘里多係上人佃種利不能十一而徵科之苦岌岌乎力不能勝以致

軍餘范海等相率控告紛然有詞復查得永寧州有孝文水峪馬房二屯原額地六十六頃四畝九分一厘該糧二百五石三斗四升七合每石折銀八錢嘉靖三十九年丈出新增地一十五頃六十畝起科糧四十六石八斗每石徵折銀五錢四十五年復丈出一十一頃八十五畝一分起科糧三十八石五斗六升每石亦徵銀五錢通將原額新增彼此牽算每畝該糧三升五合有奇查該州民田在山崖者每畝止徵糧一升一二合在平原者每畝一升五六合今前

項屯田俱錯列萬山之中。岡阜相連。並無水利可資蓄洩。間有平地亦多山澗相參。不成坵段。節年委官查勘增報地糧。恐難盡據。近於隆慶元年被大虜搶劫。人丁消耗。拋荒更多。合無將保德所屯糧照依先年舊規。每石徵銀五錢。永寧州馬房等處屯田係原額者。照舊徵銀八錢。係新增者。改五錢爲三錢。庶乎寬一分。卽受一分之賜。錢糧歲鮮逋負。屯丁得免流移。而防禦亦有所資矣。一均開派以招報中。查得三關原開派淮鹽七萬六千三百三十二引。搭配漸

鹽四萬八千九百九十九引、山東鹽二萬三千六百一十引、彼時淮鹽數多、斗頭寬減、商人皆聞風輳集、近悅遠來、至嘉靖三十年、總督軍門以宣府缺乏、題奉欽依、將淮鹽一萬九千五百五十一引、改給宣鎮、止存淮鹽五萬六千七百八十一引、復加山東鹽四萬引、有奇、淮鹽既少、搭配益多、遂致價值難齊、未免得此失彼、商人漸散、招之不來、今勘合停留填發不盡、其源皆起於此、夫浙鹽之價、其低昂臣不及知、山東之鹽、引價甚輕、大虧邊商、原本臣已於遼東疏

內題 請詳議務求兩利俱全。若淮鹽則各邊皆引首翹目。惟恐其數之不多。在三關以失此爲缺望。在宣府以得此爲奇貨。觀人情之向背如此。其間損益可知矣。合無自今山西鎮量加淮鹽一萬引。其山東鹽果爲偏多。似應量減各邊。使甘苦適均。各無異議。則三關之鹽法當自此疏通矣。再照酌處斗頭中納本色。此鹽糧不易之定例也。近據各商告稱。當青黃不接之時。米價高騰。糴買無路。願將官價照時估。與軍士折支。臣批行寧武兵備道通審各軍果否稱便。

間以得銀爲幸或以本色折色不屑屑深較夫米珠草桂惟邊塞爲然先事蓄積正所以備不虞也若以折色爲權宜必不得已用調停之法可偶一行之苟積習相仍不時據此爲例而以私智行乎其間則商人弄幻術以爲利媒軍士負虛名而無實惠矣。

清理延綏屯田疏

延綏屯田

照得榆林一鎮孤懸塞外東西皆爲虜衝兵荒頻年士不宿飽日與胡人角逐於平原易野之間往往枵腹荷戈人馬骨立孰不爲之寒心乎今查其屯田蕪

穢者強半。其間可耕之地。先是已著爲成法。勸課有
常期。斂散有常額。三令而申飭之。固宜文武兼職。更
相責成。而實效可具見也。乃有憑陵漁奪者。有影射
雄據者。有科斂誅求者。有乾沒侵欺者。有相視胡越
者。竟使耒耜之夫。強者規避。弱者流移。其能屹然自
存者或寡矣。臣驅馳入境。隨地訪求。聊爲目前計。豈
能集衆思之益。廣萬全之圖。以少助富強之業哉。
一繩侵奪以糾姦弊。查得該鎮屯田之拋荒。其害有
四。屯丁之消耗一也。虜患之頻仍二也。征科之繁苦

三也。豪強之兼并四也。除屯丁欲其生聚。虜患期於戢寧。別有督責舉行外。今以征科言之。額糧之外。有均徭馬價木蓆採辦供軍買馬等項。門類不同。名色甚多。以致言屯各官及屯頭等役。頭會箕斂。曲法侵漁。或賠荒糧。或逼徵逋負。或取協濟夫馬。以資送迎。或令抽辦柴薪。以供朝夕。誅求日甚。力不能支。且招撫復業之人。相率指爲奇貨。門攤之稅。照常派徵。遂令懷土心灰。朝蒙袂而來。夕掩泣而去。欲求屯田之日闢。何可得乎。以兼并言之。各所屯軍。視武弁皆世

受統轄之人。自非破裂身家。死生在俄頃。孰肯危言正色。訐發其奸。以取反噬之禍乎。若其同爲僚屬。則更相遮護。所至皆然。故侵奪屯田。隱占爲業。祖孫相繼。盤踞自如。凡應納屯糧。悉置諸度外。其餘官舍。彼此效尤。用強霸耕。不納子粒。往往均攤於槩衛。或捐月糧扣補。或變家產包賠。年復一年。皮盡而骨立矣。富豪者種無糧之地。貧弱者輸無地之糧。埋沒爲奸。積逋萬狀。豈獨荒年之作沴。胡馬之內侵。能爲患乎。今欲革科征之擾。須行該道清查。除力差如看堂看

庫看倉應捕獄卒之類、每年嚴行該衛掌印官督同
管屯官、從公面審、酌定上中下三則人戶、劑量編派、
其餘銀差、逐項訂正、應留者照舊存留、應革者卽時
裁革、分析明白、逐款開填若干、仍結算總該若干、然
後類爲全數、歸併一條、鞭追徵、或論丁、或論糧、各照
地方舊規、每丁若干、每石若干、刊刻小票、填定數目、
用印鈐蓋、給與屯丁收執、照此納完、其屯糧、或米豆、
或草束、該數若干、或本色、或折色、或全徵、或減免、共
該分數若干、悉照前票刊行、其糧頭則總給長單、以

示遵守。若流移復業五年外。方許量派輕差。敢有故違。從重究革。若豪強兼并。蔓引株連。未易悉拔。臣嘗建議清查。或許自首免罪。其田還官。或聽他人首告。給爲已業。或責田隣自相糾舉。扶同者連坐。或委老家旗甲。搜查簿籍。究其根柢。已經部覆奉 欽依通行各鎮。着實查行。竟不聞有一二舉發者。此固未得其樞要也。臣閱歷各邊。細加訪求。乃知各衛屯田。原有額數。若果水衝陷沒。考証無由。誠難查驗。其餘拋荒棄置。坵段具存。未有飄流別方。失其疆界者。况見

在耕種者乎。至於私相兌賣，日異月殊，而冊籍相沿，凡四至與土名，班班可考，誰得而磨滅也。各所千百戶等父祖相傳，悉有底冊。凡軍丁之消長，屯田之存沒，卽數百年，皆在耳目中。今惟責成各衛管屯官，除踏勘拋荒衆証，明實就於各所項下開註明白外，其餘埋沒欺隱者，嚴令管屯千百戶據實清查，申呈勘處。若能追出屯田，以十分爲率，六分給軍領種，四分給本官承爲己業，仍以賢能獎勵。其或隱忍縱容，巧爲掩飾，不徒住俸降級，仍革去冠帶差操，以示懲創。

間有勢孤力弱、不敢明言檢舉、恐有後禍、許開具來歷揭帖、不註衙門職名、不用印信、隨便送該道查行、亦不必開稱某衙門舉發、以廣納言之路、及該道巡歷所至、通取各該管屯官屏去左右、隔別面審、令其得以盡言、夫既重賞使知所勸、重罰使知所懲、復虛懷以導之使言、必求盡得其情而後已、兼并欺隱之弊、庶幾少有廓清之效乎、一申禁令以防騷擾、查得西路鎮靜等堡一帶地方、近因脩築邊牆、內有庚地萬頃、該道動支官銀置買牛種、分委千百戶等官

撥與步軍督率耕種歲收子粒將及五千石官之勤
情分別勸懲循其法而果斷行之自此以往卽萬石
亦可必也但查近來承委官員假公營私有強指他
人熟地冒報拋荒以圖省力者有將官牛別耕私地
而強奪他人之牛以耕官田者有散種子於所部軍
人而照數追收子粒者有將原撥步軍賣放散遣而
別行拘擾出力代耕者有強借軍人車驢馱載糧草
而倚官爲車者有旣支名下廩糧復科索步軍輪流
供應者若不嚴加禁諭恐積弊日深而軍民不勝其

擾矣。合無查照前例，逐一清查。凡有拋荒之地，堪以開墾，即便撥軍耕種。復分委各官，隨地責成，甄別勤勞，重加獎勸。其有因仍歲月，實效無聞，及利已損人，指官營私者，各叅提治罪。夫屯軍逃散，而撥操軍以屯田，大堡四十名，小堡三十名，寓兵於農，深得古人屯田之遺意。但委官督率甲乙更番，如遇調操，終非長便。臣隨地所至，質諸將領及採之輿論，咸謂各軍名下多有餘丁，其力足以開墾。但給領牛種，歲利盡入官倉，且開創工程，爲力百倍。而其田終非已業，徒

勞無補。至於快伍抽軍脩邊守隘亦皆從此差撥得
失利害。分數甚明。雖嚴父不能強人子。况可以招致
乎。合無通行曉諭。凡軍餘自願出力墾田者。照常給
與牛種。暫免徵糧。直待三年成熟之後。歲計所入。辦
納屯糧。其田不拘畝數若干。盡行給爲己業。若原主
告爭。另查別地給還。凡有抽軍及一切雜泛差役。並
不許槩行科擾。庶人人皆有所利而爲之。爭相効力
而荒蕪可盡闢矣。一給牛種以資開墾。臣自永寧
州渡河西入延綏。所至皆高山峭壁。橫亘數百里。土

人耕牧鋤山爲田雖懸崖偏陂天地不廢及至沿邊諸處地多荒蕪臣召父老面語之皆云地力薄而虜患不可測且每年牛種無從稱貸於是力無所施臣復查各該官庫初無牛種官銀非如薊遼宣大原有本項名色可以動支也乞於餘鹽銀內查一萬兩預發該鎮收貯明示開墾人戶凡缺牛種卽具狀操守等官申明驗給候秋成照數抵還年復一年照常給發待數年成熟之後不復取給于官通查原銀未常耗損或改作年例備用可也旣名牛種卽存留

該鎮不時查盤以備散給亦可也。一查拋荒以豁包賠照得該鎮東西延袤一千五百里其間築有邊牆堪護耕作。者僅十之三四虜騎鈔掠山沒無時邊人不敢遠耕其鎮城一望黃沙瀰漫無際寸草不生。猝遇大風卽有一二可耕之地曾不終朝盡爲沙磧。疆界茫然至於河水橫流東西衝陷者亦往往有之地雖失業糧額猶存臣巡歷所至不獨軍士呼號仰天飲泣而管屯官疾首蹙額凜然如蹈湯火中真使人惻然不忍聞者合無通行各該守巡兵備道將

臣前日題具准立號紙以清隱蔽一事着實舉行其間果係拋荒明開土名四至造報該道弔取先年魚鱗冊分彼此磨對果否相同仍令沿坵履畝踏勘明白若果拋荒卽豁免額糧另行召人開墾庶虛糧不累包賠而邊人各安其業矣近查得榆林衛新增糧二千四百八十石西路靖邊營等堡新增五千石借此補彼較足原額復相率開墾以漸畱之其數或亦相當也今查二項新增之地未經丈量其間有用私智而侵占過多或恃官豪而蒙蔽滋甚若以此爲實

徵之數寧免掛一而漏萬乎。必須委官親行丈勘。但求覈實。不得過求。與其較量於丈尺之間。孰若權衡於等則之辨。隨地而量定賦稅。因糧而量派均徭。或擬全徵。或行減免。悉與從宜區畫。務求允合輿情。則厲種薄收之餘。自有累絲成尺之效。而屯糧克裕。庶乎可期矣。一築塞垣以護耕作。照得該鎮地方。高仰者岡阜相連。卑下者沙石相半。其間稱爲腴田。歲雖耕牧者。十之二三耳。且天時難必。水利不興。雨暘或致愆期。則束手無從効力。此米價之騰湧。邊儲之

缺乏職此故也。查得沿邊東起黃甫川。西至定邊營。千有餘里。膏腴之地。無慮數萬頃。往年西路如安邊靖邊等處。皆虜人出入之區。邇來脩築邊牆。耕者得以安其業。而歲獲之利。輒以萬石計。惟東路絕無藩垣限隔。胡馬一鳴。卽長驅突內地。寧有耕作之日乎。今若查照西路築牆爲守。當有不貲之費。然於保障之功。耕稼之利。實百世永賴焉。或曰塞垣之築。可以扼零騎。而不足以禦大舉。況工費浩煩。不下十餘萬。若其可爲。不待今日矣。夫事每難於創始。功莫要於

漸圖往問建議諸臣皆欲一時猝舉故內帑之發
遽難取盈版鐻之夫亦虞坐困何怪乎計畫之不行
也今須酌量緩急以五年爲期在錢糧則逐年查給
而不病其擾在夫役則計口更番而不以爲勞卽不
必如往年會計之數亦可訖工矣一酌輸納以清
鹽糧照得該鎮窮荒絕徼遠商鮮至每年俱係坐派
本地有力之家中納鹽糧填給勘合竟不到淮浙地
方俱聽別省奸商中途接買卽以所得倉鈔賤售於
人在已任其勞他人享其利故開派引日常執詞控

皇明經世編

卷之三

庸中丞奏疏

延綏屯田


九

平露堂

告。或稱時估不定。或怨僉報不公。輾轉遷延。盤桓歲月。遂致原估價值。彼此懸殊。卽以爲傾蕩家貲。力不能舉。間有山西遠商。前來鎮城。將鉅資交與土商。朋合營利。各私立契券。捐資本者。計利若干。躬輸納者。分息若干。有無相資。勞逸共濟。宜其不相負也。乃有侵匿費用。訐告紛然。糧草不入倉場。身家盡爲煨燼。其不可嘆恨者。幾希矣。通商無路。將何以實粟塞下。乎。凡此皆催徵不以其時。監督不得其法。且取盈於錙銖。升斗之間。惟恐小民盡享其利。而徘徊隱忍不

屑與之、如之何其不引避而侵盜也、爲今之計、必寬其斗頭、增其腳價、一遇報中之日、卽招各商面計某倉如何、某倉如何、立限督催、刻期完報、痛絕會頭之分例、嚴革虛出之侵漁、主管者不得留難、監收者不許抑勒、若有違期、定行治罪、則凡經年累月、耗費相尋者、皆不得復售其奸矣、至於本商勘合、俱私相販賣、從來不赴運司、故本重利輕、人無固志、臣雖歷舉不至、運司止隨宜接賣、引日則非關中本意矣兩淮引價、委曲諭之、彼皆以萬里畏途、不樂遠離鄉井、夫孰能強之、今惟酌量寬減、無泥常格、令遠商風

皇明經世編

 鳳中丞奏疏

卷之三

延綬屯田

三十

平露堂

動雲從。翕然而至。仍設法監督。使飛輓無後期。所可
用力者如斯而已。一審權宜以通鹽利。查得延安

一府。原行河東鹽。但山路崎嶇。舟車難達。計程凡二

此一條先發已有論之者

千餘里。卽輸運及此。腳價視鹽價。豈但十倍哉。故百
餘年來。不聞河東商人。有運鹽至延安。投引發賣者。
夫解鹽既不入境。然則延安一府之人。豈皆淡食耶。
蓋花馬池鹽場。每年課程多溢於正額之外。商人貿
易。東入延安。所至皆坦途。卽私販者。晝夜公行。有司
置不問。誠以官鹽不到。而欲禁捕私鹽。其勢必不能

也况官民之所仰給。皆取足於此。豈容一日缺哉。故
花馬池鹽改行延安府萬口稱便。不謀同符。臣獨念
河東鹽課原有定額。今延安一府既改花馬池。則每
歲鹽課若干。義應處補。庶無後詞。已經督行分巡河
西道會同定邊兵備道查延安府每年派河東鹽課
原數若干。今花馬鹽利改行延安。歲課應若干。以此
補彼。有無相當。或額外增益若干。隨該各道會呈。河
東之課。每年一千四百六十一引。今以花馬池鹽利
照數抵補。似當有餘。但未經派行。有難懸斷。姑以一

年試之。卽大數可槩見矣。榆林糧草最稱缺乏。九邊貧苦莫此爲甚。合無將花馬池所增鹽利。盡發榆林以補屯糧之缺。其應補河東之數。待劑量明白。卽於延鎮年例銀內。每歲扣除類發宣府以補河東原額。則彼此省徵解之勞。而延綏增轉輸之利。其所仰藉多矣。或曰行鹽地方具載銅板。一旦改易恐非所宜。夫河東之鹽若果能達於延安。卽百世通行何敢中變。今名鑄銅板而水陸無可通之商。是徒有其名而全無其實也。又惡用此空文爲哉。况兩淮行鹽之地。

如江西之南贛吉安、湖廣之寶慶衡州、道路艱虞、各從其便、豈謂銅板不可移易耶、與其膠固以病法、就若變通以宜民、若謂河東之鹽、今可行於延安、則是該道扶同於有司、敢爲異說誤臣以欺陛下也、

清理固原屯田事

固原屯田

照得固原一鎮、自各邊視之、本爲內地、其屯田與民相等、耕穫之利多享其成、但於各王府功臣牧地、及苑馬寺草場、阡陌叅差、疆界混雜、蚕食兼併之患、其來已久、況先年提督馬政衙門、廣招牧軍、寬其賦

皇明經世編

卷之三

三

役以致屯丁暗將屯田投入監苑避重就輕蔓引株

連日益月甚近該總督右都御史王崇古洞察奸弊

官則云失校地在有司則云失屯田此陝西屯牧

委官清查邇流窮源悉有成緒惟靖河洮岷等處地

兩防也所各官各司其事故耳先年楊文襄自馬

方番虜交侵迄無寧歲而糧額之不均科差之日煩

政都御史改巡撫陝西仍兼馬政此時馬政修葺

猶有不忍言者臣就事採訪倍覺惻然隨督同該道

而屯田亦不侵也

及軍衛有司等官悉心講畫究其始終參諸百慮之

詳附以一得之見謹條列上請一酌新增以求

實用查得固原衛先年查出拋荒地五百三十九頃

每地一頃招軍一名共軍五百三十九名靖虜衛拋

荒地八百四十頃每地二頃招軍一名其軍四百二

足別謂山莽而耕也江南壯農止可八〇十〇畝〇耳〇〇

十名當明例初行聽募者紛然響應各謂地多而軍

少任意採擇當亦有餘各衛摘其姓名倉卒開報業

已題請矣及着實清查有名已入冊而無尺寸之

地或雖有地多不足頃畝其間離薄不堪耕種者又

十之四五甚或牽連別軍屯地用強告奪互起紛紜

此虛實混淆皆所司空文相應之過也合行委官從

實丈勘凡地之有無多寡及肥瘠可否耕種盡數查

出定爲差等或彼此搭配或酌量開除毋懸虛名致

滋實害此非樂爲紛更之勞乃所以示均平之法也
再照給地招軍以資戰守之用最爲救時之良策但
查應募者多係豪猾之人每遇調操頂名應役弓馬
器械點視全無欲令其徒手格鬪豈不難哉况時值
秋防正農事西成之日卽家有強壯悉從事南畝顧
此失彼勢難兼全若量從寬減徵糧入倉免其征調
惟警急坐派守城似爲官民兼利也一處拋荒以
免流移查得靖虜衛屯地多係沙磧肥瘠難齊槩以
一頃派糧六石草九束地畝銀一錢其間完納者十

一、包賠者十四力不能支，逃流者已十之五六，查先
年屯軍二千三百名，今已逃亡一千五百一十六名
矣，該衛孤懸河上，與套虜爲比隣，屯地荒蕪，尺藉消
耗，每念及此，可爲寒心。合行委官丈量，除係腴地及
頃畝俱足照常外，其餘通行清理，照地派糧，先定三
等九則，以爲額數，或應搭配，或應虔補，或應開豁，或
應免科，務令因人而派地，因地而徵糧，毋強責包賠，
逼其逃竄。仍填造魚鱗冊，以備查考。此不特清查屯
地，亦所以聯屬人心，爲守禦地方計也。一、寬差役

地一分者

以恤屯丁查得臨洮蘭河等衛每軍給地一分計所

或五十畝或一百二十畝爲一分也卽以五十畝

入多不過十石自每年屯糧外舊有局料草價蒔墊

論畝入止十石則一畝僅收二千矣此地力不盡

地畝椿朋等銀此外並無別項差役而地畝椿朋亦

之故

不過解貯太僕寺以備各軍買補之費猶可勉強支

持近年來邊境多事差役日繁以均徭則有上中下

門則諸銀差矣而所吏屯頭旗甲庫禁水夫兵牌城

夫諸力差皆不能免也若指揮千百戶旣查餘丁跟

用復編派伴當索見面月錢是亦不可以已乎以茶

法則每地一分寄養一馬每一月未解則供草料一

月力已難勝矣、及解各邊、并苑太二寺、一有倒死、卽
責追賠、夫道路之遠近不一、番馬之強弱難齊、其倒
死亦非解軍之所能必也、此豈可不曲爲之處乎、屯
丁人數有限、而前後召募新軍、搜括無寧時、每一戶
多至六七名、少亦不下二三名、甚則戶無空丁、盡編
行伍、每年調操防守衣甲弓馬之費、誠不忍言、况兼
管屯官溪壑之慾無窮、科歛之弊百出、如地畝每畝
銀一錢、有收至二三錢者、屯糧每斗先取樣糧一升、
仍要尖斛加耗、甚或官旗攬納加倍徵收、復以違限

問罪爲名、指稱名色、酷意誅求、雖經嚴禁、視爲虛談、凡此皆屯軍之深累、在各邊間有之、皆未至若此其甚也。查國初紅牌事例、內開一錢不許擅科、一夫不許擅役、故屯政具舉。豈如今日之沒削無已乎。合通行各該守巡兵備道、着實查議、凡軍衛屯田、除辦額糧草、及地畝銀外、其餘各色科差、某項應存、某項應革、盡將屯地內應徵本色折色、及均徭合辦數目、刊刻由帖、逐項開填、該衛用印鈐蓋、送道掛號、給屯丁遵照完納、凡一項報完、卽監收官於帖內明註完

訖二字。給還執照。如有額外多科一錢一物。許指實
陳告。以憑叅提。一定規畫。以興鹽利。照得西漳二
縣鹽額。計每年課銀不下二千兩。除漳縣成法具存。
無容別議外。惟西和縣鹽井。去該縣九十里。原無巡
視專官。以致兼併侵漁。無從禁捕。此監守之官。不可
以曠遠而廢也。原額竈丁逃亡。強半包攬煎辦。私販
盛行。此僉補之法。不可以格例拘也。往年鹽井深濬
一十二丈。近來坍塞。僅六丈有奇。井淺其半。則水勢
漸減。而鹽亦因之。此開墾之功。不可緩也。井泉凝竈。

則鹽味滋深。今甜水相侵。真味漸散。此防遏之功不可少也。貧難竈戶。私賣課鹽。商人守支。動多缺乏。遂使搭配之額。徒有虛名。竟無實數。况鹽易消折。勢難持久。此支領之規。不可不定也。今宜委該縣首領官。往來巡察。每月將查理事情。開報分守道查考。凡商竈利病。責成處分。不許營私。襲弊。苟且因循。則兼併侵漁。當自此釐革矣。清審竈丁。調停斟酌。正身者照舊應役。包攬者卽時革退。逃絕者另行僉補。如果正戶消耗。間擇民戶殷實者。酌量頂充。則課程不患其

不舉矣。鹽井漸淤，亟行濬治。凡應用木石人夫，查估明實，動支官銀，及時脩舉，則井復其舊，水當有餘，而鹽利可以取盈矣。甜水之患，首當隔絕，或近穿一井，而曲防以遏其源，或徑鑿一渠，而疏導以分其勢，則甜水之來路既斷，而井泉不失其常矣。商人鹽課，先於舊冬報納，卽於新春守支。鹽方出井，諸商環視於其間，非惟竈丁不得侵費，而消折包陪之害，亦於是可免矣。再照漳縣鹽井，去縣治三里許，指顧所及，百弊易清，惟逃絕竈丁，隨時僉補，應與西和並行，其往

年解納課銀事屬該府近議改委商人多以險遠爲累今查蘭靖地方歲有防秋之役動調客兵糧料多缺其鹽井課銀卽存留該府以備支用似爲得策